

第三名

陳意榕

愁慮个案粿

得獎感言

各位評審老師、各位朋友，大家好！

當榮幸得著教育部客語詩作獎。對自家學寫客家詩个侄來講，這隻獎項係一種當重要个肯定同鼓勵，分侄有信心繼續在客語詩創作个路項行落去。

在這重要个時刻，侄特別愛感謝正過身个阿爸對侄个支持。雖然佢這下無在身邊哩，毋過佢个愛同鼓勵，早就化做侄詩句肚个靈魂。這隻獎，係侄愛獻分佢个禮物，感謝佢留分侄最寶貴个語言天分。

侄也希望有還較多後生人共下落筆，分客家話个生命力傳承落去。最後，承蒙教育部同評審老師分侄這個機會。

承蒙大家，恁仔細！



愁慮个案粿

香醇醇仔

軟朥朥个佢

大塊放到桌頂

上上下下，跔等水流

兩枝筷仔，積惡分散

混亂當中，就恁樣溜落去

番豆麩同糖粉个懷抱肚

細人仔，還奇个目神

口涎水溶溶跌

兩隔壁个孫仔

同阿婆訕嘴

磬磬鏘鏘異吵鬧

講佢金頭又錫人

紅豆餛最合味

團圓好意思、強韌个羈絆

層層圈圈縹緲

佢這兜个心肝肚

透日仔

歸身溶潦、愁勞博激

踩踩踏踏、無結無煞

撞走个佢摻

蓬白个草莓大福相堵頭

嘩啦嘩啦



遽遽連等个落水聲

搭時代共下跳舞

暢蹠蹠仔

